

**KOMUNIKABIDEAK.** Joxerra Garziak emandako hitzaldi batekin itxi zuten atzo ikasturtea

# Amaitu da jada komunikazio arloko euskarazko lehenengo masterra

EHUk eta EUSKALDUNON EGUNKARIAK elkarlanean sorturiko masterrak zazpi hilabete iraun du

Iñaki Gurrutxaga | DONOSTIA

Atzo amaitu zen Donostian EUSKALDUNON EGUNKARIAK eta Euskal Herriko Unibertsitateko (EHU) Logika, Kognizio, Hizkuntza eta Informazio Institutuak elkarlanean antolatutako masterra. *Hizkuntza, Informazioa eta Komunikazioa* izan da masterraren goiburua eta graduondoko bi titulu aurrera eramateko baliogarri da; batetik, unibertsitate masterra eta bestetik, unibertsitate espezialista titulua. Lehen aldia da komunikazioaren arloan diziplina arte-kotasuna, eta maila teorikoa eta praktikoa uztartzen dituen master bat antolatzen dela, eta «lehen urtea izateko nahiko balorazio baikorra egiten dugu», esan zuten bultzatzaileek.

Joxerra Garzia irakaslearen *Hitzaren estrategiak komunikabide zahar eta berrietan* izeneko hitzaldiarekin eman zitzaion amaiera aurtengo masterrari, eta zazpi hilabetez eskolak jaso dituzten 28 ikasleak «gustura» agertu ziren. Guztira 140 ordu teoriko eta 70 praktiko jaso dituzte. Hori dela eta, unibertsitate espezialista titulua eskuratu dute.



GARI GARAIALDE / ARGAZKI PRESS

Joxerra Garzia, atzo, masterreko azken klasea ematen.

Irati Agirreazaldegi da masterra egin duen ikasleatariko bat. Kazetaritza ikasketak egin zituen eta masterra euskaraz izateak erakarri zuen. «Kazetaritza

arloko jende gehiago izango zela uste nuen, baina hala ere gauza gehiago lantzeko gogoz gelditu naiz», adierazi zuen. Itsaso Villanuevak Euskal Filo-

logia ikasi zuen eta egindako ikasketen osagarri izateko eman omen zuen izena. Datorren urtekoan ere parte hartuko zuela adierazi zion EGUNKARIARI.

## SANFERMINAK

**Batasunari zegokion arren, PSNk botako du aurtur txupinazoa**

Erredakzioa | IRUÑEA

Batasunak ez du aurtur Sanferminetako txupinazoa botako, berez egokitu arren; eta eginbehar hori PSNko zinegotzi batek egitea erabaki zuen atzo Iruñeko Udalaren bozeramaile batzordeak.

Udalak igorritako oharak dioenez, proposamena Yolanda Barcina alkatearena izan zen, baina PSNko eta CDNko bozeramaileen babesaren izan zuen.

Hiru alderdi horiek goratu zuten 2000ko abuztuaren 10ean, ETak Berriozarren Francisco Casanova tenienteordea hil eta gero, Udalak erabaki zuela «ekintza kriminal horiek gaitzesten ez dituzten hautetsiek ezin dutela Udala ordezkatu», eta Batasunarekin txanda-pasa egin eta hurrengo udal taldeari ardurari ematea erabaki zuten.

## Azken bi urteotan, Osasuna eta San Antonio

Txupinazoa Sanferminetako ekitaldirik esanguratsuenetakoa da, eta aspaldian proposatutako sistemari esker, udalbatzan ordezkaritza duten alderdi guztiek, urtero txandaka, nagusitik txikienera, dute txupinazoa botatzeko ohorea.

Legegintzaldi honetan, UPNk bota zuen berea, eta hurrengo bi urteetan Barcina alkateak sistema aldatu eta kirol talde biren esku utzi zuen etxafuegoa: duela bi urte Osasuna izan zen, Lehen Mailara itzultzeagatik, eta iaz Portland San Antonio, lortutako Europako Koparengatik.

Batasunak eta EAK kritikatu egin zuten erabakia, eta giroa gaiztotu eta politizatze nahia leporatu zioten UPNri. Batasuneko udal taldeak txupinazoa botatzeko eskubidea aldarrikatu zuen, eta taldearenganako «mespretxua» zela esan.

Earentzat «onartezina» da eta aurreko urteetako argudioak «gezurrak» zirela adierazi du taldeak: «Politika eta festa nahasteko lana egiten ari dira».

## KEPA KORTA MASTERREKO ZUZENDARIA

«Komunikazioa euskaraz sortuko duen jendea prestatzea izan da gure helburua»

Iñaki Gurrutxaga | DONOSTIA

Unibertsitatea eta lan mundua elkarlanean jarri dituen masterreko zuzendaria da Kepa Korta. Masterra atzo amaitu zen eta horren inguruan egindako balorazioen berri eman dio EGUNKARIARI.

### ■ Nondik nora sortu zen masterra antolatzeko beharra?

Euskal Herriko Unibertsitateko (EHU) Logika, Kognizio, Hizkuntza eta Informazio Institutuak hizkuntza, informazioa eta komunikazioa landuko zituen ikastaro batzuk gizartearen zabaltzeko gogoak zuten, betiere, diziplina arte-kotasuna aintzat hartuz. EUSKALDUNON EGUNKARIAK ere komunikazio eta informazio ar-

loan oro har jendea prestatzeko beharra sumatzen zuen. Abiapuntu horretatik, bai ideia eta bai proposamena elkarlanean garatu ditugu.

### ■ Zein helbururekin antolatu dira graduondoko bi titulu hauek?

Komunikazioa euskaraz sortuko duen jendea sortzea eta prestatzea izan da masterraren helburua. EGUNKARIARI komunikazioaren profesionalak garatzea komeni zitzaion eta unibertsitate munduko berriz, ikerketa arloari begira jarriko den jendea prestatzea.

### ■ Eta helburu horiek bete al dituzue?

Beno, lehen emaitzak jada ikusi ditugu. EGUNKARIAN zenbait jende hasi da lanean eta, beste batzuk unibertsitatean

hasi dira tesi batzuk abian jartzeko lanetan.

### ■ Beraz, balorazio baikorra egingo duzue?

Hasiera batean ez genuen baste argi nola funtzionatuko zuen, izan ere, kazetaritza eta unibertsitatea oso mundu diferenteak dira. Guztira 28 lagun matrikulatu dira, jende oso ona. Itxura denez jendea oso pozik dago eta oso serio hartu dute gaia.

### ■ Eta zer jendek parte hartu du masterrean?

Ikasleen aldetik denetik egon da. Gehienak Euskal Filologia ikasi dutenak izan dira, eta gero kazetaritza ikasitakoak. Ikastaroak eman dituztenen aldetik berriz, kazetaritza munduko profesionalak, euskal kulturaren arloko jendea



GARI GARAIALDE / ARGAZKI PRESS

eta unibertsitateko irakasleak izan dira.

### ■ Datorren urtean jarraipena izango du ezta?

Hori da. Aurtengo ikasleek unibertsitate espezialista titulua jasoko dute eta datorren urtean jarraitzen badute unibertsitate masterra eskuratu dute. Hurrengo ikasturtean promozio berri batentzako tartea izango da.